

## Gipuzkoako Aldizkari Ofiziala

145. zenbakia

Data 2003-08-04

14658 orria

---

### 7 UDAL ADMINISTRAZIOA ARETXABALETAKO UDALA

**Telekomunikazioko ekipo eta osagaiak jartzeko hirigintza baldintzak, instalazioak eta funtzionamenduari dagokion udal ordenantza.**

---

### ARETXABALETAKO UDALA

#### *Iragarkia*

2003ko apirilaren 28an izandako Osoko bilkuran erabaki zen Aretxabaletako Udalerriko telekomunikazio-osagai eta ekipoen kokapen, instalazio eta funtzionamendurako baldintza urbanistikoak arautzen dituen udal ordenantza behin betikoz onartzea, Telefónica Móviles S.A.k aurkeztutako alegazioetatik batzuk aintzakotzat hartu eta gero.

*Aretxabaletako Udalerriko telekomunikazio-osagai eta ekipoen kokapen, instalazio eta funtzionamendurako baldintza urbanistikoak arautzen dituen Udal Ordenantza.*

#### ARRAZOIEN AZALPENA

Telekomunikazioei buruzko apirilaren 24ko 11/98 Lege Orokorraren 43. artikulua ezartzen du telekomunikazio-sare publikoen instalazio eta ustiakuntzarako banako lizentzien titularrek eskubidea izango dutela jabari publikoa okupatzeko.

Telekomunikazioei buruzko Lege Orokorrak zerbitzuen prestazioa eta telekomunikazio-sareen ustiakuntza liberalizatzearen ondorioz, operadore anitz daude jabari publikoa okupatu beharra dutenak euren sareak instalatzeko. Telekomunikazio-sareen garapena ondo antolatu ezean, kalte larriak jasan ditzakete bai ingurumenak bai hirigintzak.

Sare asko instalatzearen eragin kaltegarria saihesteko, jabari publikoan dauden sareak instalatzeko operadoreak azpiegiturak konpartitzera behartzeko aukera aurreikusten du Telekomunikazioei buruzko Lege Orokorraren 47. artikulua.

Azpiegituren erabilpena konpartitzeko prozedura, zerbitzu publikoaren gaineko betebeharrei buruzko araudiak uztailaren 31ko 1.736/98 errege-dekretuak onartuak garatzen du 49. artikuluan. Horren arabera, Zientzi eta Teknologi Ministerioaren Agindu bidez xedatuko dira prozedura hori aplikatzeko balizkoak.

Azpiegituren erabilpen konpartitua orokorrean noiz baimenduko den xedatzeko Agindua onartu ez bada ere, jabari publikoaren titular diren Administrazioek Zientzi eta Teknologi Ministerioari bidali behar dizkiote eskaerak, titular diren ondasunen erabilpen konpartitua zehazteko prozedurari hasiera emateko xedez.

Aretxabaletako udalerria titular duten jabari publikoko tarteei dagokienez, uztailaren 31ko 1.736/1998 Errege Dekretuaren bidez onartutako Araudiaren 49. artikuluan xedatutakoari jarraituko zaio telekomunikazio-azpiegituren erabilpen konpartitua zehazteko.

Erabilpen konpartitua zehazteko xedez, jendaurreko iragarki egokia egin beharko da, uztailaren 31ko 1.736/1998 Errege Dekretuaren bidez onartutako Araudiaren 49. artikulua horri jarraiki.

## I. IDAZPURUA

### XEDAPEN OROKORRAK

#### 1. KAPITULUA. Ordenantzaren xedea

##### *1. artikulua.*

Ordenantza honen xedea da Aretxabaletako udalerrian telekomunikazio-osagai eta ekipoen kokapen, instalazio eta funtzionamendurako bete behar diren hirigintza eta ingurumen-baldintzak arautzea, haien ezarpenak ahalik eta okupazio eta ikus-inpakturik txikienak eragin ditzan hiri-espazioan.

#### 2. KAPITULUA. Ezarpenerako baldintza orokorrak

##### *2. artikulua.*

Indarrean dauden Aretxabaletako Arau Subsidiarioetan ezarritako kalifikazioen arabera, telekomunikazio-instalazioak «zerbitzu orokorren» erabileran sarturik daude.

Hala ere, Ordenantza hau onartzeko unean aurreikusita dauden telekomunikazio-sistemen elementu eta ekipoa non kokatu erabakitzeke, ondorengo idazpuruetan berariaz xedatutako baldintzak beteko dira. Berton espresuki arautzen ez den beste edozein telekomunikazio-instalazio, antzeko ezaugarri morfologiko edo funtzionalak dauzkatenetarako xedatutakoari doituko zaio.

##### *3. artikulua.*

Udalak Telekomunikazio Plan Zuzentzailea eduki beharko du (Hirigintzako Prozedurari buruzko Araudiaren 76.3 artikuluaen arabera Plan Berezien izaera izango duena); hortaz, ondorengo Antolamendu Plan Partzialen, Urbanizazio Proiektuen eta Hirigintzako Plangintza garatzeko beste edozein tresnaren idazkuntzan, Plan Zuzentzaile hori bete beharko da.

Uneoro plangintzaren garapenaren berri izateko, burututa dauden, gauzatzen ari diren eta soilik proiektaturik dauden instalazioen erregistroa egingo du Udalak udal zerbitzu eskudunaren bidez; horiek guztiak ere Plan Zuzentzailean jasoko dira.

Eraikin berrien obra-proiektuetan edo eraikinak guztiz birgaitzekoetan, Telekomunikazio Azpiegitura Erkidearen (TAE/ICT) proiektua sartu beharko da, indarrean dauden arau espezifikoek ezartzen dutenari jarraiki, eta eraikinen estalkietan koka litezkeen antenen konexioen garraiabide eta instalazioetarako tokia gordeko da.

##### *4. artikulua.*

Arau orokor gisa, eraikinen fatxadetan ezin da telekomunikazio-instalaziorik ipini, 17. eta 31. artikuluetan hurrenez hurren antena txikietarako eta kanalizazio-sarerako xedatutako salbuespenak salbu.

Monumentuetan, monumentu-guneetan eta Eusko Jaurlaritzak interes kultural historiko artistikoko kultur espazio gisa katalogatu edo proposatutakoetan (Euskal Herriko Kultur Ondareari buruzko 1990eko uztailaren 3ko Legean arautuak) ez da estalkien gainean bide publikotik ikus daitekeen telekomunikazio-instalaziorik jarriko.

##### *5. artikulua.*

Antenetan ezin da inoiz identifikazio edo publizitaterako errotulu edo anagrama ikusgairik egon.

## 6. artikulua.

Ordenantza honen ondoretarako, honako kontzeptu hauek definitzen dira:

—Antena: Irrati-komunikaziorako sistemaren osagaietako bat, irrati-uhinak igortzeko zein hartzeko, edo bietarako, bereziki diseinaturikoa.

—Konmutazio-zentrala: Zirkuitu edo sareetan, terminal biren arteko ahots eta datu-trukaketarako konexioak egiten dituzten ekipoen multzoa.

—Edukiontzia: Telekomunikazio-sareetako elementu edo ekipoa kokatzeko kabina edo armairua.

—Telefoniako Base-estazioa: Area jakin bateko telefonia-sarean konexioak egitea ahalbidetzen duten telekomunikazio-ekipoen multzoa.

—Estazio emisorea: Hainbat motatako seinaleak daramatzaten banden gaineko modulazioa eta antena bidezko transmisioa egiteko ekipo eta elementuen multzoa.

—Irrati bidezko atzipeneko telefonia finakoaren erabiltzaileentzako estazioa: Eraikineko telefonia finkorako sarearekiko telefono-konexioa irrati bidez egiteko ekipo-multzoa.

—Berrigorpen/errepikapen-estazioa: Hedapenean ahuldu edo deformatutako uhinak lehengo egoerara bihurtzeko xedez tarteko transmisio-guneetan jarritako estazioa.

—Ingurumen-inpaktuari buruzko azterlana: Telekomunikazio-instalazioen ezarpenak eta funtzionamenduak ingurumenean izan dezaketen eragina zehatz-mehatz deskribatzen duen agiria, teknikari-talde eskudunak idatzia.

—Hiri-paisaia arkitektonikoaren gaineko inpaktua: Hiri-paisaian eta, bereziki, ondare historiko, artistiko edo naturala osatzen duten eraikin edo elementuetan eragindako ikus-alterazioa.

—Telefoniako mikrogelaxka: Telefonia-sareen irrati-uhinak igorri eta hartzeko balio duen ekipoa edo ekipo-multzoa, zeinen antenak, euren tamaina txikia dela-eta, eraikuntza edo eraikinen zabaltzak baino beherago koka daitezkeen, bai haien hormetan, bai hiri-ekipamenduen gainean, bai hiri-espazioko elementu apaingarri, arkitektoniko edo antzekoetan.

—Kablezko telekomunikazio-sareen azken nodoa: Kable ardazkidearen bidez erabiltzaile bakoitzari helarazteko xedez, seinale optikoa seinale elektriko bihurtzen duen ekipo-multzoa.

—Irrati-komunikazioa: Irrati-uhinen bidez igortzen den telekomunikazio oro.

—Eduki-gunea: Telekomunikazio-sareen elementu edo ekipoa kokatzeko gelaxka.

—Telekomunikazio-sarea: Kable bidez edo baliabide optiko zein bestelakoez definituriko amaiera-puntuaren artean seinaleak transmititzea ahalbidetzen duten transmisio-sistemak eta, bidezkoa denean, konmutazio-sistemak eta gainerako bitartekoak.

—Telekomunikazioa: Hari, irrati-elekttrizitate, baliabide optiko edo beste sistema elektromagnetiko batzuen bidez egiten den mota guztietako zeinu, seinale, idazki, irudi, soinu edo informazioen transmisio, igorpen edo hartze oro.

—Telekomunikazio-sistema: Telekomunikazio-terminalek eta telekomunikazio-sarearenek osatzen duten multzoa, transmisio zein telekomunikazio-sistemak barne harturik.

## II. IDAZPURUA

### TELEFONIA-SAREAK OSATZEN DITUZTEN INSTALAZIOAK

1. KAPITULUA. Telefonía mugikor, irrati bidezko telefonía eta telefonía publikoko beste zerbitzu batzuen instalazioei buruzko alderdi orokorrak

#### 7. artikulua.

Telefonía mugikorreko zerbitzuak edo irrati bidezko beste telefonía-zerbitzu batzuk emateko ekipoak, antenak, base-estazioak, irrati bidezko loturak eta beste edozein instalazio eraikinetan edo espazio publiko zein pribatuetan instalatzeko edo aldatzeko, udalerriko sare osoaren Hedapen Plana aurkeztu beharko da. Plan horren baitan, estaldura geografikoari buruzko irizpide teknikoan bidez justifikatu beharko da proposatutako irtenbidea, egon litezkeen beste irtenbide batzuekin alderatuz.

#### 8. artikulua.

Idazpuru honetan aurreikusitako ekipo, antena, base-estazio eta gainerako instalazioak, une bakoitzean eskueran dagoen teknologiarik onenarekin egindakoak izango dira kostu onargarrien barruan (eta operadoreek hala justifikatu beharko dute), ikus eta ingurumen-inpaktua eta pertsonen osasunean izan lezakeen eragina minimizatzeari begira.

#### 9. artikulua.

Instalazioei buruzko mugapenak:

—Ez da baimenduko ingurunerako ikus-inkaktu onartezina eragiten duen ekipo, antena, base-estazio edo idazpuru honetan aurreikusi den beste instalaziorik.

—Arau orokor gisa, eraikin edo gune babestuetan ezin izango da ekipo, antena, base-estazio edo idazpuru honetan aurreikusi den beste instalaziorik jarri, ondare historiko, artistiko eta monumentalaren babesaren eskumena duten udal eta foru-zerbitzuek onetsitako salbuespenezko kasu zehatzetan izan ezik.

—Hirigintza, ingurumen eta paisai arrazoiek eta pertsonen osasunaren zaintzak exijitzen dutenean, interesatuei entzun ondoren, Udalak operadoreek instalazioen kokalekuak konpartitu beharra ezarri ahal izango du, nahiz eta kokaleku horiek lehendik beste operadore batzuentzat baimendurik egon.

—Eremu elektromagnetikoen eraginari dagokionez, idazpuru honetan bildutako instalazioek bete egin beharko dituzte administrazio eskudunek emisio elektromagnetikoei buruz promulgatzen dituzten arauak, Ordenantza honen arau-eremua zehazten duen, irrati jaulkipenen aurrean osasuna babesteko hartu beharreko neurriak, irrati jaulkipenen aurrean mugapenak eta irrati herri jabaria babesteko baldintzak ezartzen dituen Araudia onartzen duen irailaren 28ko 1.066/2001 Erret Dekretuan jasotzen diren arauak.

#### 10. artikulua.

Idazpuru honetan aurreikusitako ekipo, antena, base-estazio eta gainerako instalazioen funtzionamendu egokia ziurtatzeko eta pertsonen osasuna babesteko xedez, lizentziak 2 urtean behin berrikusi ahal izango dira, lizentzia ematen denetik edo azken berrikuspena egiten denetik zenbatuta.

Berrikuspena Administrazioarekin lankidetzan diharduten eta kreditazio egokia duten Entitateek egin ahal izango dute. Aipatutako epea iraganda berrikuspena egin ez bada, lizentziak beste 2 urtez luzatuko dira beste izapiderik gabe.

Telefonia mugikorreko eta irrati bidezko telefoniako instalazioei dagokienez, berrikuspenerako irizpidea izango da ikus eta ingurumen-inpaktua murriztu beharra eskatzen duen ingurunearen egoera aldatzea.

## 2. KAPITULUA. Eraikinen estalkiaren gainean kokaturiko base-estazioak

Horrelako antenen instalazioa Plan Zuzentzaileak proposatutako aldeetan baimenduko da. Salbuespen gisa, beste alde batzuetan instalatzea ere baimendu ahalko da, Planean zehaztutako aldeetan jartzeko ezintasun teknikoa frogatzen bada edo hala behar duten teknologia berriak agertuz gero. Salbuespen horietan, aztertu egin beharko da ezarpena eta, ondoren, Plan Zuzentzailean agerrarazi.

### 11. artikulua.

Telefoniako base-estazioen instalazioan ahalik eta tamaina, konplexutasun eta ingurumen zein ikus-inpakturik txikienak ahalbidetzen dituzten eta beharrezko segurtasun-baldintzak bermatzen dituzten teknologia eta diseinuak erabiliko dira. Horrez gain, operadoreek kokalekuak edota euste-egiturak konpartitzeko joerari eutsiko zaio, ordenantza honetan adierazi bezala.

Edozein kasutan eta ahal den neurrian, ondoren zerrendatutako arauak bete beharko dira, eta aukeratutako irtenbideak teknikoki justifikatu, udal teknikariek, goian aipatutako irizpideen arabera, balorazioa egin eta onartu edo arbuia ditzaten:

a) Debehatuta dago antenak eraikinen fatxadaren erremateko karelari eutsirik ipintzea.

b) Antenei eusteko hagek edo euskarriek ondorengo beharkizunak bete beharko dituzte estalki lauan, dorreen alboetako paramentuetan edo estalki horretako edozein elementu irtenetan kokatu ahal izateko:

— Instalazio horien edozein osagaik, kokaturik dagoen eraikinaren kanpoko edozein fatxadaren planoarekiko gutxienez 2 metro atzerago egon behar du.

— Haga edo euskarriak eta antenek osatzen duten multzoak estalki edo terraza lauaren gainetik izan dezakeen gehienezko altuera kono angeluzuzen baten erpinarena da, non, konoaren ardatza haga edo euskarria izanik, beraren sortzaileak 45°ko angelua osatu behar duen ardatz horrekin, eta kanpo-fatxadaren karel edo ertzaren bertikalaren altueratik gutxienez 1 m-ra egon. Altuera hori ez da inolako kasutan 8 m-tik gorakoa izango.

— Euskarriari zirkunskribaturiko hagaren edo zilindroaren diametroak 6"koa (15,24 cm) izan behar du gehienez.

— Antenak eta euskarria zirkunskribatzen dituen zilindro ingurutzailaren diametroa ezin da 120 cm-tik gorakoa izan, baldin eta beste operadore batzuekin konpartitzeko asmoa ez badago, balizko horretan 170 cm-koa izango baita gehienezko diametroa.

— Haga edo euskarriari eusten dioten sokak, elementu horren altueraren heren bat ez gainditzeko eran finkatuko dira.



c)Estalki makurretan finkatutako antena-euskarri edo hagek aurreko atalean bildutako arauak bete behar dituzte, honako berezitasun honekin:

—Haga edo euskarriak eta antenek osatzen duten multzoak estalkiaren gainetik izan dezakeen gehienezko altuera kono angeluzuzen baten erpinarena da, non, konoaren ardatza haga edo euskarria izanik, beraren sortzaileak 30°ko angelua osatu behar duen ardatz horrekin, eta kanpo-fatxadaren karela edo ertzaren goiko ertzarekin bat egin. Altuera hori ez da inolako kasutan 8 m-tik gorakoa izango.



d)Segurtasunari begira, jendeak ez du irispiderik izango ez telefonia mugikorrekiko base-estazioetara, ez antenari eusten dion egituratik 6 m-ko perimetroko ingurura.

#### 12. artikulua.

11. artikuluari dagokionez, salbuespen gisa, antenak estalkien gailurretan, dorreen gain-gaineko erpinetan nahiz gailur-puntuetan, edo estalkiaren beste edozein toki irtenetan finkatu ahal izango dira, baldin eta, udal zerbitzu eta organo eskudunen iritziz eta eskatzaileak aurkeztutako dokumentazio teknikoan deskribatutako konposizioaren arabera, jarri nahi den instalazioa osotasunean ondo integratzen bada, eta antenak eraikinaren errematearekiko harmoniatsu geratzen badira; edo, baita ere, irtenbide horrek azpiegituraren erabilera operadore gehiagorekin konpartitzeko aukera ematen badu.

#### 13. artikulua.

Telefoniako base-estazio jakin bati loturiko edukiontziak eraikin edo eraikuntzen estalkian kokatzeko, ondorengo irizpideak beteko dira ahal den heinean:

a)Baimena duten beharginek baino ez dute haietarako irispidea izango, segurtasun eta babes pertsonalerako ezarritako baldintzetan.

b)Instalazioak ez du kolokan jarriko ez eraikinaren egiturazko segurtasuna, ez bertako bizilagunena.

c)Gutxienez 3 m-ko distantziara kokatuko dira eraikinaren kanpoko fatxadetik. Gehienezko altuera: 3 m. Edukiontzia bide publiko, espazio ireki edo barruko patioetatik ikusgai badago, inguratzailearen kolorea eta itxura eraikinak dituenetara egokituko da, eta kokalekuak bat etorri beharko du estalkiaren konposizioarekin.

d)Estalki makurretan estalkiaren azpian edo horren inguratzailearen barruan ipiniko dira beti. Salbuespen gisa, Udalak inguratzailetik at jartzeko baimena eman dezake, arrazoi teknikoengatik beharrezkoa izanez gero, betiere haien materiala eta forma estalkirako aproposak baldin badira. Bide publiko, espazio ireki edo barruko patioetatik ikusgai badaude, aurreko atalean azaldutako baldintzak beteko dira.

e)Edukiontziak ezin ditu oztopatu estalkian eraikinaren eta bertako instalazioen artapan eta mantentze-lanez arduratzen diren pertsonen sarbidea eta igaroa.

f)Kasu orotan bermatu egin beharko da antenek funtzionatzeko behar duten ekipo eta elementu elektroniko gehigarrien isolamendu termiko, akustiko eta elektromagnetikorako hartzen diren neurrien eraginkortasuna.

#### 14. artikulua. Familia bakarrekiko etxebizitzak dauden inguruetakoko babesak.

Esparru hauetakoko eraikinen estalkian antenak edo telefoniako base-estazioei atxikiriko beste edozein osagai jarri ahal izateko, ezinbestekoa izango da aurreikusitako instalazioen ezaugarriek eta kokalekuaren baldintzek paisaiarekiko mimetismo egokia lortzen dutela, eta beraz, instalazioak ez duela ikus-inpaktu desatseginik eragingo justifikatzea, ingurumen-inpaktuari buruz aurkeztu den azterlanaren bidez.

Salbuespen gisa horrelako inguruetan lurrean finkatutako instalazioak –16. artikuluan jasotakoak– jarri ahal izateko, ingurumen-inpaktuari buruz aurkeztu den azterlanaren bidez frogatu egin beharko da, antenaren altueraren arabera

(zerbitzuaren eraginkortasuna lortzeko ahalik eta txikiena) paisaia babesteko hartutako neurriek paisaiarekiko mimetismo egokia lortzen dutela, landare edo bestelako osagaien bidez.

#### *15. artikulua. Babes berezia.*

Plangintza-tresnen bidez katalogatutako eraikin eta elementuei dagokie babes-mota hau, bai eta, katalogaturik egon ez arren, hiri-inguruan bakanak direlako ondore hauetarako Udal Zerbitzuen iritziz irizpen bera merezi dutenei ere.

Horrelako lekuetan instalazio-mota oro saihestuko da, proposatutako irtenbideak ikus-inpaktu ezatseginik eragiten ez duela frogatu ezik, betiere, ondare historikoa artatzeko eskumena duten udal edota foru-organismoek hala ebazten badute.

### 3. KAPITULUA. Lurrean finkatutako haga edo euste-egituren gaineko antenen instalazioa

Horrelako antenak Plan Zuzentzaileak proposatutako eremuetan instalatu ahal izango dira. Salbuespen gisa, beste alde batzuetan ere instalatu ahal izango dira, Planean zehaztutako aldeetan jartzeko ezintasun teknikoa frogatzen bada edo hala behar duten teknologia berriak agertuz gero. Salbuespen horietan, aztertu egin beharko da ezarpena eta, ondoren, Plan Zuzentzailean agerrarazi.

#### *16. artikulua.*

Beste kokaleku horiek baimendu ahal izateko, ingurumen-inpaktuari buruzko azterlana aurkeztu beharko da, haren ezarpenak eta funtzionamenduak inguruan izan lezaketen eragin zehatzarekin, eta Ordenantza honen 40. eta 42. artikuluetan aipatutako gainerako dokumentazioarekin batera.

Instalatzean, ikus-inpaktua ahalik eta gehien leundu eta paisaia ondo integratzea lortzeko udal zerbitzu teknikoek xedatutako neurriak errespetatu beharko dira. Antenak eta horren euskarriak osatutako multzoaren gehienezko altuera osoa ezin da 40 m-tik gorakoa izan. Horien ezarpena salbuespenezkoa izango da bizitegi-erabilerako eremuetan (14. artikulua arabera), non gehienezko altuera 25 m-koa izango den.

Bide lasterren aldameneko inguruetan, Gipuzkoako Errepide eta Bideen gaineko 17/1994 Foru Arauan ertzen babesari buruz ezarritako manuak bete beharko dira.

Eraikuntzarik ez dagoen lursailetan, Udalak ezarriko ditu, kasua bada, lizentziaren profesionaltasun-baldintzak.

Ahal dela, operadoreek konpartitu egingo dute kokaleku edota euste-egituren erabilera, Ordenantza honen 33. artikuluan xedatutakoari jarraituz.

### 4. KAPITULUA. Eraikinen fatxadetako instalazioak

#### *17. artikulua.*

Eraikin jakin batzuen fatxadan antenak instalatu ahal izateko, tamaina txikikoak (mikrogelaxkak edo antzekoak) eta, ezarrierari dagokionez, fatxadaren konposizioarekiko egokiak izan behar dute, apaindurari zein edergarriekin inolako kalterik eragin gabe. Edozein modutan ere, honako arau hauek beteko dira:

a) Erlaitzaren sestraren azpitik jarri behar dira, eraikinaren edergarriak narriatu gabe.

b) Fatxadaren konposizio-eritmoari doituta kokatu behar da.

c) Fatxadaren planetik antenatarako tarte ezin da 25 cm baino luzeagoa izan. Tarte hori fatxadan dauden beste osagai batzuekiko (errotuluak, markesinak,) neurtu ahal da udalaren baimenarekin, betiere hirigintza-araudiak kasu bakoitzean baimentzen duen hegala gainditzen ez badu.

d) Kanalizazioaren edo kablearen trazatua harmoniaz integratu behar da fatxadan, eta dagokion paramentuaren kolorekoa izan behar du.

e) Edukiontzia bide publikotik ezin ikusteko lekuan ipiniko da.

Eraikin babestu eta katalogatuetan ez da horrelako instalaziorik baimenduko.

### 5. KAPITULUA. Antena txikiak hiri-ekipamendua osatzen duten eraikuntza edo elementuen gainean instalatzea

*18. artikulua.*

Udalak bidezko iritziz gero, eta hitzarmen egokiaren bidez, antena txikiak argien makulu, informazio-zutabe, kiosko edo hiri-ekipamenduko beste edozein elementuren gainean jarri ahal izango dira, ondorengo baldintzak betez gero:

a)Antenaren koloreak eta itxurak bat etorri behar dute inguruarekin.

b)Edukiontzia, ahal dela, sestraren azpian jarriko da. Salbuespen gisa, beste toki batean ezartzea baimendu ahal izango da, instalazioa hiri-paisaian harmoniaz integratzen dela eta zirkulazioa oztopatzen ez duela frogatuz gero.

## 6. KAPITULUA.Irrati bidezko atzipeneko telefonia finakoaren erabiltzaileentzako estazioen antenak

Horrelako antenak Plan Zuzentzaileak proposatutako eremuetan instalatu ahal izango dira. Salbuespen gisa, beste alde batzuetan ere instalatu ahal izango dira, Planean zehaztutako aldeetan jartzeko ezintasun teknikoa frogatzen bada edo hala behar duten teknologia berriak agertuz gero. Salbuespen horietan, aztertu egin beharko da ezarpena eta, ondoren, Plan Zuzentzailean agerrarazi.

*19. artikulua.*

Eraikinen estalkietan, ahal den heinean, ondoko kokalekuetan ezarri ahal izango dira soilik:

a)Estalki lauen gainean, dorreen estalkiak edo estalkiaren beste edozein irtenunetan izan ezik. Haga edo euskarriak eta antenek osatzen duten multzoak estalki edo terraza lauaren gainetik izan dezakeen gehienezko altuera kono angeluzuzen baten erpinarena da, non, konoaren ardatza haga edo euskarria izanik, beraren sortzaileak 45°ko angelua osatu behar duen ardatz horrekin, eta kanpo-fatxadaren karela edo ertzaren bertikalaren altueratik gutxienez 1 m-ra egon. Gehienezko altuera hori ezin kasutan ez da 4 m-tik gorakoa izango. Antenaren kokalekutik kanpo-fatxaden lerroetara ezin da 2 m-tik behera egon.

b)Kanpo-fatxaden aurkako alderantz jaisten diren estalki makurretan edo estalkiaren beste edozein osagai irtenetako paramentuei itsatsirik, bide publikotik ezin ikus daitezkeenean.

Salbuespen gisa, aurreko ataletan azaldutako beharkizunen arabera jarri ahal izateko eragozpen objektiboak daudenean, antena estalkiaren gainean ipini ahal izango da, bide publikotik suma litekeen ikus-inpaktua minimizatzeko baldintzak betetzen baldin baditu.

Lurraren gainean ere ezarri ahal izango dira, alegia partzela pribatuetan, familia bakarreko etxebizitza dagoen inguruetan edo eraikuntza irekiko aldeetan, betiere ikus-inpaktua ahalik eta gehien leuntzeko neurriak hartzen baldin badira, paisaian egoki integratzearen.

Bi kasu horietan eta xede horrekin, hautatu den irtenbidearen proposamena aurkeztu beharko da proiektuaren barruan. Udal zerbitzu tekniko eskudunek inpaktua maila onargarrietaraino murrizteko ezintasuna sumatuz gero, ukatu egin ahal izango da instalatzeko baimena.

## 7. KAPITULUA.Konmutazio-zentraletako antenen instalazioa

Horrelako antenak Plan Zuzentzaileak proposatutako eremuetan instalatu ahal izango dira. Salbuespen gisa, beste alde batzuetan ere instalatu ahal izango dira, Planean zehaztutako aldeetan jartzeko ezintasun teknikoa frogatzen bada edo hala behar duten teknologia berriak agertuz gero. Salbuespen horietan, aztertu egin beharko da ezarpena eta, ondoren, Plan Zuzentzailean agerrarazi.

*20. artikulua.*

Horrelako ekipoen ezaugarri morfologiko eta funtzionalak ikusita, instalazioak Ordenantza honen 25. eta 26. artikuluetan azaldutako arauak bete beharko ditu kokapenaren arabera.

### III. IDAZPURUA

#### KABLEZKO TELEKOMUNIKAZIO-SAREAK

*21. artikulua.*



Euren barruan kablezko telekomunikazio-sareetako azken nodoak gordetzen dituzten eduki-guneak, ahal den guztietan, sestra-lerroaren azpian edo eraikinetan integraturiko lokaletan ezarriko dira, beti sestra-lerroaren parean. Salbuespen gisa, beste tokiren bat onar liteke, betiere instalazioa hiri-paisaia harmoniaz integratzen dela eta zirkulazioa oztopatzen ez duela frogatuz gero.

#### IV. IDAZPURUA

##### IRRATI ETA TELEBISTA-EKIPOAK

###### 1. KAPITULUA.Lurreko irrati eta telebista-seinaleak hartzeko antenak

Horrelako antenak Plan Zuzentzaileak proposatutako eremuetan instalatu ahal izango dira. Salbuespen gisa, beste alde batzuetan ere instalatu ahal izango dira, Planean zehaztutako aldeetan jartzeko ezintasun teknikoak frogatzen bada edo hala behar duten teknologia berriak agertuz gero. Salbuespen horietan, aztertu egin beharko da ezarpena eta, ondoren, Plan Zuzentzailean agerrarazi.

###### 22. artikulua.

Antena horiek, bide publikotik ez ikusteko moduan edo ahalik eta gutxien ikusteko eran ipiniko dira.

Izaera kolektiboa izango dute. Hala ere, eraikin jakin batean antena kolektiboa jartzea galarazten duten salbuespenezko arrazoi objektiboak daudenean, banako antenak ezarri ahal izango dira antena kolektiboari buruz aipatutako baldintza berberekin, baldin eta udal zerbitzu eskudunen iritziz eraikin horretan banako antenak ipintzea arriskutsua edo antiestetikoa ez bada.

Eraikinean jadanik legeztaturiko antenaren bat badago, horrek antena kolektiboaren izaera hartuko du, eta eraikinaren jabeak edo jabeen komunitateak beharrezko neurriak hartu beharko ditu eskatzen duten guztiek konektatzeko aukera izan dezaten, antena instalatzeko prezioaren zati proportzionalaren ordainketa adostutakoan.

Ezin izango dira eraikinik gabeko espazioetan instalatu, berdin diolarik erabilera publikoak edo pribatukoak diren.

Eraikinen estalkietan, ondoko kokalekuak baino ez dira baimenduko:

a)Estalki lauak, dorreen estalkiak edo estalkiaren beste edozein irtenune izan ezik. Antenaren kokalekutik kanpo-fatxaden lerroetara ezin da 5 m-tik behera egon.

b)Kanpo-fatxaden aurkako alderantz, barruko patioetarantz edo mehelinetarantz jaisten diren estalki makurrak, bide publikotik ezin ikus daitezkeenean.

c)Fatxada edo patioetako karelen barruko paramentuak eta estalkiaren osagai irtenetako paramentuak, betiere bide publikotik ezin ikus badaitezke.

Eraikin-multzo batean aldi berean esku hartzea eskatzen duten arkitektura-jarduketetan, sistema bakarra aurreikusi beharko da funtzio bakoitzerako.

Antenetan ezin da inoiz identifikazio edo publizitaterako errotulu edo anagrama ikusgairik egon.

###### 2. KAPITULUA.Satelite bidezko irrati eta telebista-seinaleak hartzeko antenak

Horrelako antenak Plan Zuzentzaileak proposatutako eremuetan instalatu ahal izango dira. Salbuespen gisa, beste alde batzuetan ere instalatu ahal izango dira, Planean zehaztutako aldeetan jartzeko ezintasun teknikoak frogatzen bada edo hala behar duten teknologia berriak agertuz gero. Salbuespen horietan, aztertu egin beharko da ezarpena eta, ondoren, Plan Zuzentzailean agerrarazi.

###### 23. artikulua.

Antena horiek, bide publikotik ez ikusteko moduan edo ahalik eta gutxien ikusteko eran ipiniko dira.

Izaera kolektiboa izango dute. Hala ere, eraikin jakin batean antena kolektiboa jartzea galarazten duten salbuespenezko arrazoi objektiboak daudenean, banako antenak ezarri ahal izango dira antena kolektiboari buruz aipatutako baldintza berberekin, baldin eta udal zerbitzu eskudunen iritziz eraikin horretan banako antenak ipintzea arriskutsua edo

antiestetikoa ez bada.

Eraikinean jadanik legeztaturiko antenaren bat badago, horrek antena kolektiboaren izaera hartuko du, eta eraikinaren jabeak edo jabeen komunitateak beharrezko neurriak hartu beharko ditu eskatzen duten guztiek konektatzeko aukera izan dezaten, antena instalatzeko prezioaren zati proportzionalaren ordainketa adostutakoan.

Ezin izango dira eraikinik gabeko espazioetan instalatu, berdin diolarik erabilera publikokoak edo pribatukoak diren.

Eraikinen estalkietan, ondoko kokalekuak baino ez dira baimenduko:

a)Estalki lauak, dorreen estalkiak edo estalkiaren beste edozein irtenune izan ezik. Antenaren kokalekutik kanpo-fatxaden lerroetara ezin da 3 m-tik behera egon.

b)Estalki makurrak, ondoko arauak betetzen baldin badira:

—Isurialde triangeluarretan, bide publikora ematen duen fatxadaren aurkako alderantz, barruko patioetarantz edo mehelinarentz jaisten diren estalki makurrak, bide publikotik ezin ikus badaitezke.

—Antena ezein kasutan ez da izango gailurra, dorrearen erpina edo elementu irten hurbilena baino altuagoa.

c)Fatxada edo patioetako karelen barruko paramentuak eta estalkiaren osagai irtenetako paramentuak, betiere bide publikotik ezin ikus badaitezke.

Horrelako antenak eraikin nahiz multzo katalogatuetan edo bide nagusietako eraikinetan ezartzeko, eraikin, multzo edo bide babestuaren kontrako edozelako eragin kaltegarri saihesteko erarik egokienean ipini beharko dira. Xede horrekin, hautatu den irtenbidearen proposamena aurkeztu beharko da proiektuaren barruan, dauden aukera guztietan onena dela arrazoituz eta frogatuz. Ondare historikoa, artistikoa eta monumentala babesteko eta hiri-paisaia hobetzeko eskumena duten zerbitzu teknikoaren aldeko txostena lortu beharko da. Horien eragina maila onargarrietara murrizteko ezintasuna sumatuz gero, ukatu egin ahal izango da instalatzeko baimena.

Antenetan ezin da inoiz identifikazio edo publizitaterako errotulu edo anagrama ikusgairik egon.

### 3. KAPITULUA.Irrati-amateurren estazioen antenak

#### 24. artikulua.

Irrati-lizentzien titularrei aitortzen zaien eskubidea, amateurren irrati-estazioak higiezinaren kanpoaldean ezartzeko manuak ematen dituen 19/1983 Legean (azaroaren 16koa)xedatutakoari doituko zaio, bai eta instalazioaren baldintza teknikoak xedatzeko promulgatuko den estatu-arautegian eta ikus-inpaktua minimizatzeko xedez Ordenantza honetan ezarritakoari ere.

Irrati-amateurren estazioetako antenak eraikinen estalkian instalatzeko, Ordenantza honen 22. artikuluan zehaztutako kokapen-baldintzak bete behar dira.

Lurraren gainean ere ezarri ahal izango dira, partzela pribatuetan, familia bakarreko etxebizitza dagoen inguruetan edo eraikuntza irekiko aldeetan, izan dezakeen ikus-inpaktua ahalik eta gehien leundu eta paisaian egoki integratzeko beharrezko neurriak hartzen baldin badira.

Eraikin berean irrati-amateurren antena bat baino gehiago ipintzeko aukera administrazioaren iritziazen pean egongo da, eta eragin dezakeen ikus-kutsadura hartuko du oinarri.

Irrati-amateurrek ezin dute eraikin berean horrelako instalazio bat baino gehiago eduki, eta, hori edukitzeko ere, eraikin horretako etxebizitza edo lokal baten titular edo maizter izan behar dute.

Instalazioaren titularrak Komunikazio Idazkaritza Nagusiaren arauzko baimena lortu behar du aldeztu aurretik.

### 4. KAPITULUA.Irrati eta telebista-zerbitzuen emisio, errepikapen eta berremisio-estazioak

Horrelako antenak Plan Zuzentzaileak proposatutako eremuetan instalatu ahal izango dira. Salbuespen gisa, beste alde batzuetan ere instalatu ahal izango dira, Planean zehaztutako aldeetan jartzeko ezintasun teknikoa frogatzen bada edo hala behar duten teknologia berriak agertuz gero. Salbuespen horietan, aztertu egin beharko da ezarpena eta, ondoren, Plan

Zuzentzailean agerrarazi.

*25. artikulua.*

Irrati eta telebista-zerbitzuen emisio, errepikapen eta berremisio-estazioei atxikiriko antenak eta horien euste-egiturak eraikinen estalkiaren ganean ipini ahal izateko, xedetzat dituen jarduerak udal lizentzia izan behar du, eta ezarrera-baldintzak eta ikus-inpaktua leuntzeko aurreikusitako neurriak onargarriak izan.

Antenaren eta horren egituraren altuera osoa 8 m-tik gorakoa bada, dagokion Antolamendu Plan Berezia proposatutako kokalekuan jarduera beharrezkoa dela frogatzen duena onartu beharko da aldez aurretik. Dokumentazio teknikoan, Ordenantza honen 44.1.2 artikulua c) atalean zehaztutakoa sartu beharko da.

*26. artikulua.*

Horrelako antenak lurrian ipini ahal izateko, xedetzat dituen jarduerak dagokion udal lizentzia izan behar du eta ondoko arauak bete behar dira:

—Antenaren eta horren euste-egituraren altuera osoa 35 m-tik gorakoa ez bada, edo 25 m-tik gorakoa bizitegi-erabilerako inguruetan, 16. artikuluan xedatutako baldintzetan ipini ahal izango da.

—Guztira hori baino altuagoa bada, dagokion Plan Berezia proposatutako kokalekuan jarduera beharrezkoa dela frogatzen duena onartu beharko da aldez aurretik. Dokumentazio teknikoan, Ordenantza honen 44.1.2 artikulua c) atalean zehaztutakoa sartu beharko da.

5. KAPITULUA. Entitate bakar batek erabiltzeko irrati-lotura eta irrati-komunikazioetarako estazioen antenak

Horrelako antenak Plan Zuzentzaileak proposatutako eremuetan instalatu ahal izango dira. Salbuespen gisa, beste alde batzuetan ere instalatu ahal izango dira, Planean zehaztutako aldeetan jartzeko ezintasun teknikoa frogatzen bada edo hala behar duten teknologia berriak agertuz gero. Salbuespen horietan, aztertu egin beharko da ezarpena eta, ondoren, Plan Zuzentzailean agerrarazi.

*27. artikulua.*

Irrati-lotura eta irrati-komunikazioetako estazioei atxikiriko antenak entitate bakar baten erabilerarako ezarri nahi izanez gero, bete egin beharko dira antenaren eta euste-egituraren altueraren arabera 25. eta 26. artikuluetan xedatutako baldintzak.

6. KAPITULUA. Estatuaren defentsa, segurtasun publiko, babes zibil eta Herri Administrazioak zuzenean kudeatzen dituen beste zerbitzu batzuetarako telekomunikazio-ekipoak

*28. artikulua.*

Instalazio horiek, indarrean dagoen plangintza-tresna orokorrean horrelako erabileretarako aurreikusitako lur eta eraikinetan kokatu ahal izango dira, edo beste edozeinetan, Udalak eta organo titularrak xede horretarako hitzartutako baldintzetan.

## V. IDAZPURUA

### KANALIZAZIO-SAREA

*29. artikulua.*

Arau orokor gisa, seinalea hartzeko sistemaren oinarriaren eta anplifikazio-sistemaren arteko banaketa-lineek eta azken sistema honen eta bere eratorrien artekoek lur azpitik edo hodian barruan joan behar dute.

Horiek instalatzeko obrak udal jabari publikoko obra, zerbitzu eta instalazioak arautzen dituen Ordenantzari lotuko zaizkio. Lizentziak lortzeko prozedura eta jabari publikoaren okupazio konpartituak Telekomunikazioei buruzko 11/98 Lege Orokorrean Ordenantza honen VII. Idazpuruan aipatutakoan xedatutakoaren menpe egongo dira eta, egokituz gero, subsidiarioki, baita Ordenantza honen I. Eranskinean, Udal Telekomunikazioen Plan Zuzentzailean adierazitakoaren pean ere.

*30. artikulua.*

Eraikin berrien obra-proiektuetan edo eraikinak guztiz birgaitzekoetan, Telekomunikazio Azpiegitura Erkiderako (TAE/ICT) beharrezko kanalizazio-sarearen ezarpena aurreikusiko da, indarrean dauden berariazko arauetan finkatzen den diseinuaren arabera.

*31. artikulua.*

Salbuespenetan eta guztiz birgaitzeko obrak egingo ez diren eraikinetan, kable-lineak barruko patioetan zehar ipiniko dira, edo bide publikotik ezin ikus daitezkeen aldeetan.

Hori teknikoki ezinezkoa bada, lineak fatxadetan zehar jarri ahal izango dira Udalaren oniritziarekin, betiere ondo disimulatzen badira, horien trazatua erlaitzekiko, kanpo-zorrotnekiko, dilatazio-junturekiko edo dauden osagai bertikal jarraituekiko paralelo etorraraziz, eta eroanbide edo kablearen kolorea paramentuarenarekin berdinduz. Konexio-elementuak eta transmisio-ekipoak ahalik eta txikienak izango dira, eta teknikoki ahal den heinean, ez dira fatxadatik 25 cm baino gehiago irtengo. Horien kokapena eta kolorea fatxadaren konposizioari doituko zaizkio.

Horrelako balizkoak aztertzeko, eskatzaileak bere salbuespenezko egoera azaltzen duen memoria, kokapenaren eta erabiliko diren materialen proposamena eta trazatuaren definizioa, gutxienez 1/50 eskalako planoan, aurkeztu beharko ditu.

## VI. IDAZPURUA

### INGURUMENA BABESTEKO ETA INSTALAZIOEN SEGURTASUNA BERMATZEKO BALDINTZAK

*32. artikulua.Arauk betetzea.*

Edozein telekomunikazio-sarearen osagai eta ekipoen ezaugarriek eta babes-sistemek, indarrean dauden berariazko arauak bete behar dituzte.

*33. artikulua.Inpaktuak minimizatzea eta kokaleku eta azpiegiturak konpartitzea.*

Telekomunikazio-sareen osagai eta ekipoen instalazioa une bakoitzeko teknologiarik aurreratuenarekin egin beharko da, ahalik eta tamaina eta konplexutasun txikienak izan daitezzen, eta ikus-inpaktua ahalik eta gehien murrizteko, segurtasun-berme nahikoarekin.

Kokaleku edota euste-egitura bakarra operadore batek baino gehiagok erabiliz gero, antenak ipintzean ahalik eta tarterik txikiena utziko da elementu horien artean, eta ahalik eta gehien zaindu konposizio-erritmoa, hiri eta natur paisaian ezin hobeto integratzeko xedez.

*34. artikulua.Lurrerako hartunea.*

Ordenantza honetan xedatzen den telekomunikazio-sare ororen osagai edo ekipoei lurrerako hartunea izango dute, elektroteknikari buruz indarrean dauden arauetan xedatzen denez.

*35. artikulua.Deskarga elektrikoen aurkako babesa.*

Antena emisoreen, emisore-hartzaileen eta horien instalazio osagarrien kokalekua, euren euste-egitura edozelakoa dela ere, atmosferako elektrizitate-deskargetatik babesturik egongo dira, indarrean dauden berariazko arauetan ezartzen den eran.

*36. artikulua.Hozkuntza-sistemak.*

Edozein eduki-guneren klimatizaziorako hozkuntza-sistemak ezin ikus daitezkeen tokietan ipiniko dira, eta haien funtzionamendua bat etorriko da arauetan xedatutako manuekin.

*37. artikulua.Irisgarritasuna.*

Telekomunikazio-ekipoen ezarpenak ezin du oztopatu eurak dauden higiezinaren artapen eta mantentze-lanez arduratzen direnen sarbidea.

*38. artikulua. Edukiontziei buruzko segurtasun-baldintzak.*

Edukiontzien xede bakarra telekomunikazio-ekipoetako berezko tresnak gordetzea izango da.

Bisitagarriak badira, gutxienez 0,80 m-ko zabalerako eta 1,90 m-ko altuerako atea izango dute, irteerarantz zabalduko dena.

Edukiontzietatik hurbil, erabilera anitzeko ABC hautsezko edo karbono-anhidridoazko su-itxalgailu mugikorrek ipiniko dira, instalazioaren araberako eraginkortasuna izan beharko dutenak. Gutxienez, 13-a eraginkortasuneko itxalgailu bat egongo da.

*39. artikulua. Arauak betetzea.*

Edozein telekomunikazio-sareren osagai eta ekipoen ezaugarriek eta babes-sistemek, indarrean dauden berariazko arauak bete behar dituzte.

## VII. IDAZPURUA

### ORDENANTZA HONEN ERAGINPEKO LIZENTZIEN ARAUBIDE JURIDIKOA

#### 1. KAPITULUA. Okupazio-lizentziak, lurzoruaren sailkapenaren arabera. Prozedura

*40. artikulua. Lurzoru Urbanizagarriko prozedura.*

#### PLAN PARTZIALAREN IZAPIDEAN

—Jendaurreko iragarki bidez, hedapen-plana eskatuko zaie telekomunikazio-sare publikoak ezartzeko banako lizentzien titular diren operadoreei.

—Sustapen Ministerioiko organo eskuduna den Komunikazio Idazkaritza Nagusiaren txostenaren eskaera (11/98 Legearen 44.2 art.).

#### URBANIZAZIO PROIEKTUAREN IZAPIDEAN

—Iragarpena (20 egun), operadoreek jabari publikoaren erabilera konpartitzeko interesa adieraz dezaten.

—20 eguneko epea (11/98 Lege Iragankorraren 47.2 art.), horretarako interesa duten operadoreen arteko akordio tekniko eta komertziala gauzatzeko.

—Guztien baterako proiektua, ondorengoak ere zehaztu behar dituenak:

Instalazioaren justifikazioa.

Erabilera konpartituaren kostu/prezioen banaketa.

Instalazioen banaketa.

Mantentze-lana eta zaintza.

Erantzukizunak.

—Sustapen Ministerioiko organo eskudunak Komunikazio Idazkaritza Nagusiak prestatutako txostena (11/98 Legearen 44.2 art.).

—Udal baimena.

*41. artikulua. Lurzoru Urbanizaezinerako Prozedura.*

Telekomunikazio-zerbitzuak instalatzeko obren lizentziak, interes orokorreko obrak diren aldetik, 42. artikuluan hiri-lurzorurako aurreikusitako baldintza berberetan izapidetuko dira.

*42. artikulua.Hiri-lurzorurako Prozedura.***JABARI PUBLIKOAREN OKUPAZIOA**

—Operadoreek lizentzia eskatu eta Hedapen Planaren eta horren iraupenaren gaineko aurre-proiektua aurkeztea.

—Iragarpena (20 egunez), operadoreek jabari publikoaren erabilera konpartitzeko interesa adieraz dezaten.

—20 eguneko epea (11/98 Lege Iragankorraren 47.2 art.), horretarako interesa duten operadoreen arteko akordio tekniko eta komertziala gauzatzeko.

—Guztien baterako proiektua, ondorengoak ere zehaztu behar dituen:

Instalazioaren justifikazioa.

Erabilera konpartituaren kostu/prezioen banaketa.

Instalazioen banaketa.

Mantentze-lana eta zaintza.

Erantzukizunak.

—Sustapen Ministerioko organo eskudunak Komunikazio Idazkaritza Nagusiak prestatutako txostena (11/98 Legearen 44.2 art.).

—Udal baimena.

**JABETZA PRIBATUAREN OKUPAZIOA**

—Operadoreek lizentzia eskatu eta Hedapen Planaren eta horren iraupenaren gaineko aurre-proiektua aurkeztea.

—Iragarpena (20 egunez), operadoreek jabari pribatuko ondasunen erabilera konpartitzeko interesa adieraz dezaten.

—20 eguneko epea (11/98 Lege Iragankorraren 47.2 artikulua), horretarako interesa duten operadoreen arteko akordio tekniko eta komertziala gauzatzeko.

—Lurralde Antolamenduan eskumena duen Autonomia Erkidegoaren txostena, 15 egunetik 2 hilabetera bitartean (11/98 Lege Iragankorraren 46.2 art.).

—Guztien baterako proiektua, ondorengoak ere zehaztu behar dituen:

Instalazioaren justifikazioa.

Erabilera konpartituaren kostu/prezioen banaketa.

Instalazioen banaketa.

Mantentze-lana eta zaintza.

Erantzukizunak.

—Sustapen Ministerioko organo eskudunak Komunikazio Idazkaritza Nagusiak prestatutako txostena (11/98 Legearen 44.2 art.). Txosten horrek barne hartzen du erabilera publikoaren adierazpena (edo, bestela, nahitaezko igarobide-zortasunaren adierazpena), Nahitaezko Desjabetzeari buruzko Legean azaltzen denaren ondoretarako.

—Operadoreen eta jabeen arteko hitzarmen edo akordioa jabetza horren erabilerari dagokionez, edo bestela, nahitaez desjabetzeko prozeduraren hasiera.

—Udal baimena.

## 2. KAPITULUA. Obren eta jardueren lizentziak

### 43. artikulua. Lizentziak.

1. Telekomunikazio-ekipoen instalazioa dagozkion udal baimenen menpe egongo da.

2. Erradiazio elektromagnetikoen arriskua dakarten Telekomunikazio-instalazioen lizentziak eskuratu ahal izateko, erantzukizun zibilararen aseguru-poliza aurkeztu beharko da derrigorrez, eta behar besteko estaldura eta iraupena izan beharko ditu.

3. Asegurua izatea ezinbestez bete beharreko baldintza da lizentzia eskuratu ahal izateko.

4. Ordenantza honetan aurreikusitako ondoretarako, bertan araututako jarduerak ondorengo sailkapenari lotzen zaizkio, Euskal Herriko Ingurumena Babesteko 3/98 Legeari eta hori garatzen duten manuei jarraituz:

—Jarduera salbuetsiak.

—Jarduera sailkatuak.

5. Jarduera salbuetsiak deritze, 165/1999 Dekretuaren arabera, honako hauei:

—I. Eranskina: Hiri-lurzoru industrialean garatu nahi diren jarduerak: Transformazio-zentroak, errepikagailuak eta antzeko instalazioak.

—II. Eranskina: Lurzoru urbanizaezinean garatu nahi diren jarduerak: Transformazio-zentroak, errepikagailuak eta antzeko instalazioak.

—III. Eranskina: Bizitegi-erabilerako hiri-lurzoruan garatu nahi diren jarduerak: Informazioaren tratamendu eta komunikazio-zerbitzuak ezartzeko xedea duten jarduketak (kalkulu-zentroak, datu-bankua, irrati eta TB errepikagailuak, satelite bidezko errepikagailuak, informazioaren tratamendu elektronikoa nahiz informatikoa egiteko zentroak, estazio radiotelefonikoak eta radiotelegrafikoak, irrati eta TB emisoreak; alarmak kontrolatzeko eta poliziari deitzeko zentrala eta abar), etxebizitzaren eraikinaren beheko solairuan edo eraikin salbuetsietan.

6. Jarduera sailkatuak dira Euskal Herriko Ingurumena Babesteko 3/98 Legean araututakoak:

—i) Jarduera komertzialak eta zerbitzuak, oro har.

—ñ) Osasunean eta ingurumenean antzeko eragina duten beste jarduera batzuk.

Beraz, jarduera sailkatu salbuetsi gabeak dira, aurreko lerroaldean salbuetsien definizioari lotzen ez zaizkion instalazio guztiak.

7. Udalari jakinarazi behar zaizkion bakarrak honakoak dira: Indarrean dagoen lizentziaren titularra aldatzeko eskaerak, eta antenak, euskarriak edo edukiontzietan instalatutako aparatuak antzeko beste batzuek ordeztzekoak, bai eta irrati eta telebista-zerbitzuak hartzekoak ere.

### 44. artikulua. Jarduera sailkatuek manuzko dituzten xedapen partikularrak.

1. Arau Subsidiarioetako prozedura-manuek orokorrean xedatzen duten eta dagokion instalazioaren izaera eta ezaugarrietarako beharrezkoa eta egokia den dokumentazioaz eta teknikari eskudunak sinatutako eta dagokion elkargo profesionalak bisatutako proiektu teknikoaz gain, horren barruan, 3/98 Legearen arabera dagokion ondorengo dokumentazio osagarria ere aurkeztu behar da gutxienez:

1.1. Bere ezarpenak eta funtzionamenduak kanpo-ingurumenean eta inguruko eraikin eta eraikuntzen barruan izan dezakeen eragina zehatz-mehatz azaltzen duen Ingurumen Inpaktuari buruzko Azterlana, honako datu haiek bildu behar dituena:

—Estatuko Administrazioeko organo eskudunek ingurumenaren osasun-gaietan xedatutako arau eta manuek betetzen direla kreditatzen duen agiria. Ondore horretarako, Zientzi eta Teknologi Ministerioak proiektu teknikoa onartu izanaren ziurtagiria izango da justifikatzeko bidea.

—Zaratak eta dardarek eta aire bero edo biziatuaren indarrezko kanporaketak eragindako ingurumen-inpaktuak.

—Hiri-paisaia arkitektonikoari dakarkion ikus-inpaktua.

—Inpaktu horiek desagerrarazteko hartuko diren neurri zuzentzaileak eta horiei aurreikusitako eraginkortasun-maila.

1.2.Instalazioak bide publikoaren sestra-lerrotik ikusita eragiten duen ikus-inpaktua irudikatzeko eta aukeratutako kokalekua eta instalazioa justifikatzeko dokumentazioa, ondorengoak ere sartuz:

a)Fotomuntaketa:

—Instalazioaren aurrealdea (ahal baldin bada).

—Eskuineko albo: Bideaz beste aldeko espaloitik, eta instalaziotik 50 m-ra.

—Ezkerreko albo: Bideaz beste aldeko espaloitik, eta instalaziotik 50 m-ra.

Udal Zerbitzuek bidezkoa iritziz gero, horiez gain, oinezkoen ikusmiratik edo beste toki batzuetatik hautematen den ikus-inpaktuaren simulazio grafikoa ere aurkeztu beharko da.

b)Instalazioaren kokalekuaren planoak, eskala egokian, eta kableen trazatuarena (trazatu bertikal eta horizontaletan duen ezarrera), instalazioa kanpo-fatxadan egiteko asmoa badago.

c)Ordenantza honen 25, 26 eta 27. artikuluetan araututako instalazioei dagokienez, horien gehienezko altuerak bertan aipatutakoak gainditzen baditu, hiri-profilak islatzen dituzten sekzio topografiko ortogonalak ere erantsi beharko zaizkio dokumentazioari.

2.Kasu orotan, instalazioak ingurumenean eta hiri-estetikan izan dezakeen eraginari buruz Udal Zerbitzu eskudunek prestatutako aldeko txostena behar izango da, bai eta Eusko Jaurlaritzako Kultura Sailarena edo Hirigune Historikoen, Kolonia Babestuen, Barruti Periferikoetako Hiribildu Historikoen eta, oro har, katalogaturiko elementuen gaineko jarduketetan Sail horrek gaur dauzkan eskumenak hartzen dituen organoarena ere.

3.Kokalekua, egin beharreko obrak eta eskaeran zehaztutako telekomunikazio-jarduera baimentzen dituzten lizentziak aldi berean emango dira.

*45. artikulua.Jarduteko lizentzia.*

Jarduera sailkatuetarako telekomunikazio-ekipo edo instalazioak abian jarri aurretik, funtzionamendurako hirigintza-lizentzia eskatuko zaio Udalari.

*46. artikulua.Jarduera salbuetsiei dagozkien xedapen partikularrak.*

1.43. artikuluaaren arabera jarduera salbuetsien definizioari lotzen zaizkion jarduerak gauzatzen hasi aurretik honako dokumentazio hau aurkeztu beharko da:

a)Arauzko eskaera-orria.

b)Obra eta instalazioei buruzko memoria azalgarri eta justifikagarria, hiri-paisaia arkitektonikoari eragingo zaion ikus-inpaktuaren fotomuntaketak eta simulazio grafikoa erantsirik.

c)Eskala egokiko planoak: Obra eta instalazioena, instalazioak eraikinean edo eraikuntzan izango duen kokalekuarena eta kableen trazatuarena (trazatu bertikal eta horizontaletan duen ezarrera), instalazioa kanpo-fatxadan egiteko asmoa badago.

d)Obra eta instalazioen erantzukizuna duen enpresaren kreditazio ofiziala.

2.Esandako dokumentazioa aurkeztuta, prozedura jarraitu egingo da 165/1999 Dekretuan, artikuluetan ezarritako tramiteen arabera.

3.Aurreko lerroaldean aipatzen den dokumentazioa aurkeztearekin batera emango da obrak baimenduko dituen baimena; dena den, Udal Administrazioak nahi dituen egiaztapenak egin ahal izango ditu indarrean dauden manuek ematen dizkioten kontrol eta diziplina-ahalmenak erabiliz.



### 3.KAPITULUA.Telekomunikazio-ekipoen instalazioak artatu, kendu eta ordezteko jarraibideak

#### *47. artikulua.Artatzeko betebeharra.*

1.Lizentziaren titularrak segurtasun, osasungarritasun eta apaintasun-egoera egokian mantenduko du telekomunikazio-ekipoen instalazioa.

2.Telekomunikazio-ekipoen instalazioak artatzeak ondorengo helburuak betetzeko beharrezko mantentze-lan guztiak biltzen ditu:

a)Instalazio horiek baimentzean ezarritako baldintzak betetzea.

b)Eraginkortasun, segurtasun, osasungarritasun eta apaintasun-baldintzak betetzea, baita instalazioetako euskarrietan ere.

#### *48. artikulua.Instalazioak edo horien osagai batzuk kentzea.*

Lizentziaren titularrak edo instalazioen jabeak telekomunikazio-ekipoak edo horien osagaiak eraitsi eta kendu egin beharko ditu jarduera behin betiko eten bada edo horren elementuak erabiltzen ez badira. Eta horiek eraitsi edo botatzean, instalazioari eusten dion lursaila, eraikuntza edo eraikina haiek instalatu baino lehen zegoen bezala utzi beharko du.

#### *49. artikulua.Instalazioen berriztapena eta ordezpena.*

1.Lehenengo instalazioaren betekizun berberak bete beharko dituzte instalazioen berriztapen edo ordezpen osoak eta horien ezaugarrien eraldaketak, ezaugarri horiek baimena emateko edo osagaietako batzuk xedatutako ezaugarriak ez dituzten beste batzuek ordezteko erabakigarriak izan badira.

2.Lizentzia edo baimena iraungiz gero, Udalak instalazioa berritzea edo ordeztea agindu ahal izango du.

#### *50. artikulua.Burutzapen-aginduak.*

Ordenantza honen 47 eta 48. artikuluetan xedatutakoaren betearazpena bermatzearren, Udal organo eskudunak beharrezko burutzapen-aginduak emango ditu, Hirigintzako Diziplinari buruzko Araudiaren 10. artikuluko arauetan ezarritako prozedurari jarraituz, honako alderdi hauek zehaztuko dituena:

a)Telekomunikazio-ekipoak eta instalazioak artatzeko obligazioa betetzeko edo, dagokionean, instalazioa edo osagaietako bat kentzeko egin beharreko lan eta obrak.

b)Agindutakoa borondatez betetzeko epea, egin behar diren lanen garrantziarekin, tamainarekin eta konplexutasunarekin bat etorriko dena.

c)Burutzapen-aginduan zehaztuko da, egin beharreko obren tamainaren arabera, proiektu teknikoa eta, kasua bada, zuzendaritza fakultatiboa exijitzen direnents.

### 4.KAPITULUA.Legezotasuna babesteko eta arau-hausteak zehatzeko araubidea

#### *51. artikulua.Telekomunikazio-ekipoen instalazioen ikuskapena eta diziiplina.*

Ordenantza honetan araututako telekomunikazio-ekipoen kokalekuaren, instalazioaren obrak barne eta funtzionamenduaren hirigintza-baldintzak Hirigintzako Diziiplina Araubidean ikuskapenari buruz aurreikusitako manuean egongo dira, eta zehazten diren udal organoen eskumenekoak izango dira legezotasuna babestearen eta diziplinaren inguruko ahalmenak.

#### *52. artikulua.Legezotasunaren babesa.*

1.Ordenantza honetan xedatutakoa urratzen duten ekintzek edo ez-egiteek ondoren azaltzen diren neurriak eragin ahal izango dituzte, bakoitzerako aurreikusitako prozedurari jarraituz.

a)Narriatutako hirigintza-ordena berrezartzea; Hirigintzako Diziiplina Araudian ezarritakoari lotuko zaio guztiz.

b)Dagokion zehapen-prozedura izapidetu ondoren, isunak jartzea, Herri Administrazioen Araubide Juridikoaren eta Administrazio Prozedura Erkidearen Legean xedatutakoa aplikatuz.

2.Kasu orotan, Udal Administrazioak hartuko ditu ukitutako ondasunak legearen aurkako egoera jazo aurretik zeudenetara itzultzeko neurriak.

*53. artikulua.Arau-haustek eta isunak.*

Ordenantza honetan telekomunikazio-ekipoen kokaleku, instalazio eta funtzionamenduari buruz xedatutako hirigintza-arauak hausten dituzten ekintzak eta ez-egiteak, Estatuko, Autonomia Erkidegoko eta Udaleko hirigintza-legerian eta ondorengo artikuluetan xedatutakoari jarraiki zehatuko dira.

*54. artikulua.Arau-hausteen sailkapena.*

1.Ordenantza honetan bildutako manuak urratzen dituzten ekintzak edo ez-egiteak arau-hauste larri edo arau-hauste arintzat jo daitezke Hirigintzako Diziplina Araubideak xedatutakoaren arabera.

2.Arau-hauste larriak dira:

a)Ordenantza honen 43.4 artikuluan azaltzen diren telekomunikazio-ekipoen instalazioa eta obrak, kasua bada, lizentziarik gabe egitea.

b)Ordenantza honen 43.4 artikuluan azaltzen diren telekomunikazio-ekipoek baimen edo lizentzian zehazten diren baldintzak bete gabe funtzionatzea.

c)Ordenantza honetako 47 eta 48. artikuluetan aipatzen diren telekomunikazio-ekipoen instalazioa artatu eta kentzeko betebeharrak ez betetzea.

3.Arau-hauste arinak dira:

a)43.3 artikuluan aipatutako telekomunikazio-ekipoen instalazioei buruz Ordenantza honetan xedatutakoa urratzen duten ekintzak eta ez-egiteak.

b)Kasu orotan, zehapen-prozeduran interes orokorreari eragin zaien kaltearen garrantzi txikia frogatzen denean, Ordenantza honetan xedatutakoa urratzen duten ekintzak eta ez-egiteak arau-hauste arintzat hartuko dira.

*55. artikulua.Subjektu erantzuleak.*

1.Telekomunikazio-ekipoak artatu eta kentzeko eginbeharren erantzukizunaz xedatutakoa baztertu gabe, obra edo jardueraren promotorea, instalazioa egin duena eta telekomunikazio-ekipoaren jabea izan ahal dira Ordenantza honetan tipifikatu diren arau-hausteen subjektu erantzuleak.

2.Erantzukizuna zehazteko, Hirigintzako Diziplina Araudian bildutako manuak aplikatuko dira.

*56. artikulua.Zigorrak.*

1.Ondoren azaltzen den bezala zehaztuko dira Ordenantza honetan jasotako arau-hausteei dagozkien zigorrak:

a)Egindako obra, instalazio edo jarduketaren balioaren %1etik %15era arteko isuna ezarriko zaie Ordenantza honetako 54.3 artikuluan aipatutako arau-hauste arinak egin dituztenei.

b)Ordenantza honen 54.2 artikuluan aurreikusitako balizkoetan, honako arau hauek izango dira manuzkoak:

—Instalazioak artatu eta kentzeko eginbeharrak betetzeko egin behar diren obra osagarrien %10 eta %20 bitarteko isuna ezarriko zaie –Udal Zerbitzu Teknikoek kalkulatu– Ordenantza honen 50. artikuluan aipatutako burutzapen-aginduak bete ez dituztenei.

—Instalazioaren %1 eta %10 bitarteko isuna ezarriko zaie –Udal Zerbitzu Teknikoek kalkulatu– Ordenantza honetan aurreikusitako jarduketak lizentziarik gabe gauzatzen dituztenei, betiere aipatu jarduketa horiek legeztagarriak badira.

—Instalazioaren %10 eta %20 bitarteko isuna ezarriko zaie –Udal Zerbitzu Teknikoek kalkulatu– Ordenantza honetan aurreikusitako jarduketak lizentziarik gabe gauzatzen dituztenei, baldin eta instalazioa legeztagarria ez bada.

—Ordenantza honetan araututako jarduketak, lizentzia eduki arren ezarritako baldintzen kontra eginez gero, lizentziarik

gabeko jarduketatzat hartuko dira, legezkotasuna babesteko eta urratzeak zehatzeko araubidearen ondoretarako, eta aurreko ataletan azaldutako irizpideekin bat ezarriko zaie isuna, Zerbitzu Tekniko eskudunek kalkulatu.

*57. artikulua.Zehapenen aplikazioa eta preskripzioa.*

Ordenantza honetan aurreikusitako zehapenak Hirigintzako Diziplina Araudian xedatutakoari jarraituz aplikatuko dira.

#### XEDAPEN IRAGANKORRAK

*Lehenengoa.* Ordenantza hau indarrean jarri baino lehen baimen egokirik gabe ezarritako telekomunikazio-instalazioek ondorengo irizpideei lotuz erregularizatu beharko dute beren egoera:

1.Ordenantza honen 43.3 artikuluan jarduera salbuetsi gisa sailkatutako instalazioak, Ordenantza honetan aurreikusitako baldintza urbanistikokoak betetzen dituzten jakinarazitako egintzen berezko prozeduraren eraginpean baino ez daudenak, legezkatutzat hartuko dira ezelako izapiderik gabe.

2.Aurreko atalean aipatutako baldintzak betetzen ez dituzten jarduera salbuetsien instalazioek eta 38. artikulukoekin bat datozen jarduera sailkatuek bi urteko epea izango dute –legezko testu hau indarrean sartzen denetik zenbatuta– euren egoera erregularizatu eta lizentzia eskatzeko; baina instalazioa 16. artikuluan aipatutako kokalekuetako batean badago, epea urtebetekoa izango da, aipatutako egun horretatik kontatzen hasita.

*Bigarrena.*Ordenantza honetan arautzen diren instalazioen titularrek, berau indarrean hasi baino lehen behar bezala baimendurik ezarritako instalazioetan, gorde egingo dituzte eskuratutako eskubideak, baina ez da baztertzeko bidezkoak liratekeen egokitzapenak egin beharra, Ordenantza honetan xedatutako prozedurekin bat eta gehienez lau urteko epean goian aipatutako egunetik hasita.

Indarrean dagoen legeriak aldi baterako izaera eta apurka-apurka baztertzekoa esleitzen dienez, betebeharrak horretatik salbuetsirik daude telefonia mugikor automatiko analogikoko zerbitzuetarako instalazioak, betiere, haietako bakoitzarentzat ingurumen-inpaktuari buruzko azterlana aurkezten bada, eta Estatuak ingurumen-osasunaren arloan emandako arau edo manuak betetzen dituztela eta litezkeen ingurumen eta ikus-inpaktuak minimizatu edo deuseztatu egingo dituztela frogatzen bada.

*Hirugarrena.*Indarrean dagoen legeriak aldi baterako izaera eta apurka-apurka baztertzekoa esleitzen dienez telefonia mugikor automatiko analogikoko zerbitzuei, zerbitzu horren instalazioen egungo egoera errespetatuko da, haien banakako baimena edo titulua iraungitzen den egunerarte, zeina egungo araudiarekin bat etorri 2007ko urtarrilaren 1a baino harago luzatu ezingo den.

#### XEDAPEN GEHIGARRIA

Ordenantza hau indarrean hasten denetik urtebeteko epean, Udalak Erregistro Berezia sortuko du Aretxabaletako udalerrian telekomunikazio-zerbitzuetako emisio eta harrera-instalazio guztiak inskribatzeko.

Erregistroa ofizioz edo interesatuak eskatuta egingo da, eta lizentziaren titularraren datuak eta instalazioa baimentzeko ezarritako baldintzak agertu behar dira bertan.

#### AZKEN XEDAPENAK

*Lehenengoa.*Ordenantza honetan araututako gaiak ukitzen dituzten eta goragoko maila duten arauak promulgatu eta indarrean sartuz gero, horietatik aplikatuko dira automatikoki; dena den, geroago aukera egongo da Ordenantza beharrezkoak diren alderdietan egokitzeko.

*Bigarrena.*Toki Araubidearen Oinarriak xedatzen dituen apirilaren 2ko 7/1985 Legearen 7.2 eta 65.2 artikuluetan ezarritakoari jarraituz, Ordenantza hau, Udaltzatzen Osoko Bilkurak behin betiko onartu ondoren, Euskal Herriko Agintaritzaren Egunkarian guztiz argitaratu eta hamabost egunera sartuko da indarrean eta aldatzea edo indargabetzea erabakitzen den arte izango da manuzkoa.

Aretxabaleta, 2003ko uztailaren 15a.—Arritxu Oliden Bergara, Alkatea.

(1047) (8380)

